



## Antara Dua Zaman



**DULU** Pemandangan kawasan depoh Keretapi Tanah Melayu di tepi Sungai Klang, Kuala Lumpur pada tahun 1970-an.



**KINI** Di atas tapak depoh Keretapi Tanah Melayu tersergam Pejabat Pos Besar dan Menara Dayabumi di Kuala Lumpur.

- Gambar UDA

# Hari ini, 50 tahun lalu

29 Ogos 1957, 3 Safar 1377

## ● Susunan baru Kabinet Kerajaan Persekutuan

KABINET kerajaan Perikatan, Persekutuan Tanah Melayu yang merdeka akan mengandungi 13 orang. Kebanyakan anggota Kabinet adalah menteri-menteri yang sedia ada tetapi akan bertukar kementerian sahaja. Ketua Menteri, Tunku Abdul Rahman, memberitahu wartawan beliau akan mencadangkan kepada Yang di-Pertuan Agong nama jemaah menteri apabila diminta membentuk Kabinetnya bagi Persekutuan Tanah Melayu yang merdeka.

Tunku belum dapat menyatakan sama ada menteri-menteri muda akan dilantik atau tidak. Beberapa orang penolong menteri akan dinaikkan pangkat menjadi menteri penuh. Tiga menteri yang tidak bertukar kementerian ialah Abdul Aziz Ishak, Sardon Jubir dan Sir Henry Hau Shek Lee. Tunku Abdul Rahman yang sehingga tengah malam 30 Ogos menjadi Ketua Menteri akan menjadi Perdana Menteri merangkap Menteri Hal Ehwal Dalam Negeri.

## ● Tunku membuat tawaran akhir kepada komunis

Kerajaan Persekutuan akan menawarkan syarat-syarat menyerah diri kepada pengganas-pengganas komunis

yang telah berjuang menentang kerajaan selama hampir sembilan tahun. Pengumuman dibuat oleh Ketua Menteri, Tunku Abdul Rahman Putra. "Sekiranya tawaran itu yang akan dibuat oleh kerajaan Perikatan tidak diterima oleh komunis, bermakna mereka itu menganggap Persekutuan Tanah Melayu sebagai musuh mereka," kata Tunku.

## ● Kanak-kanak dilahirkan di hari merdeka dapat hadiah

Satu pengumuman dibuat di Melaka mengenai hadiah yang akan diberikan kepada kanak-kanak yang dilahirkan antara pukul 12.05 tengah malam 31 Ogos hingga 6 petang 31 Ogos 1957. Wang sebanyak RM180 diberikan kepada mereka yang miskin yang melahirkan anak di hospital-hospital di Melaka, Alor Gajah dan Jasin.

## ● Jamuan besar untuk bakal Perdana Menteri Malaya

UMNO Johor Bahru akan mengadakan jamuan makan malam secara besar-besaran pada 10 September 1957 kerana meraikan Tunku Abdul Rahman. Setiap ahli yang hadir perlu membayar RM3 seorang. UMNO Cawangan Bagan, Batu Pahat akan menyambut kemerdekaan dengan mengadakan majlis membaca doa kesyukuran dan marhaban. Malam keduanya diadakan pula permainan-permainan

orkes, pencak silat, kompiang dan lain-lain.

## ● Datuk Tan tak hadir dalam istiadat kemerdekaan

Dato Tan Cheng Lock, Yang Dipertua MCA, memaklumkan beliau tidak dapat hadir di Istiadat Pengisytiharan Kemerdekaan di Stadium Merdeka pada 31 Ogos disebabkan masalah kesihatan yang selalu mengganggu beliau. Tetapi beliau akan hadir di perhimpunan besar Perikatan yang akan diadakan pada malam 30 Ogos 1957 di Padang Sultan Sulaiman Club dan akan memberi ucapan di perhimpunan besar itu.

## ● Petani-petani menaburkan bunga emas-perak semasa perayaan kemerdekaan

Bunga emas dan perak yang berbentuk kecil seperti bunga lawang akan ditabur dalam majlis perjumpaan penanam-penanam padi dan ahli-ahli Syarikat Kerjasama Kedah Utara kerana merayakan kemerdekaan Tanah Melayu di Padang Court, Alor Star pada 7 September 1957.

Tujuan program itu ialah apabila Persekutuan merdeka kelak, benih-benih padi akan tumbuh dengan subur seperti mana bunga-bunga emas dan perak, oleh itu penghidupan kaum tani akan lebih makmur. Untuk tujuan tersebut hampir 30 tahlil emas dan perak telah ditempah dijadikan bunga-bunga kecil untuk ditaburkan.